

Col sondaje la jent pel dir la sia su la fujion

L'aministrazion de Comun vel mantegnir sia autonomia gestionèla e no se meter ensema a Vich e Poza. Tel debatit l'é stat uzà fora ence la oujes a favor

Soraga - En jebia ai 30 de jugn l'aministrazion de Comun de Soraga à chiamà ite na scontrèda publica per rejonèr de gestion sozièdes, ambic e fujion. La rejon, descheche à spiegà l'ombolt Devi Brunel, l'é stat l gran rejonèr da man di sentadins de la fujion anter i Comuns de Poza e Vich e la prospetiva che ence Soraga posse n fer pèrt. Sun paladina de La Gran Ciasa se à sentà jù l'ombolt e nef conseieres che à portà dant sia posizion e responet a la domanes de la jent.

“La lege provinciala perveit le gestion soziade, l'é n obligh – à spiegà l'ombolt Brunel, verjan l debatit – cheste le aessa cognù pontar demez dant de la fin del 2016 delaitè dai doi ambic pervedui da la Provinzia ma desche na saeta a ciel seren se é vegnui a saer de la scelta di Comuns de Poza e Vich de se meter ensema. La fujion cogn vegnir fata per na forta spenta de la jent e no per n descors economich o auter percheche canche fenesc i enteresc va dut en crousc, donca l'é na scelta che cogn vegnir tutta da la jent.” Dapò coi papieres te man l'ombolt é jit tel merit de la costion. “Delaite de la delibera di Comuns de Poza e Vich aon troà valch aspet che no se pel meter en discusion. Prum de dut al Comun più gran ge vegn dat la senta legala, i ofizies e le competenze maore. Dapò l'é l descors de la raprezentanza, demò tel prum mandat ge vegn garanti a duc i sogec che se met ensema la raprezentanza delaite de l'esecutif, ma dal secondo mandat no più. E l prum mandat dura demò fin al 2020 e donca nience doi egn. Chest



L'ombolt de Soraga Devi Brunel e l Consel a la scontrèda publica chiamèda ite per rejonèr de la fujion.

l'é chel che ne à fat fermar, ajache nosc picol paisc de Soraga perdesa soa autonomia, chela che ne à permetù de se svilupar e de aer chel che aon anchencondi. Per me e per l'aministrazion de Soraga – à dit l'ombolt Brunel – perder l'autonomia aministrativa l'é n priesc massa aut da paar. Ben segur no podon dir per tenc de egn amò che podaron aer noscia autonomia ma podessa ence esser che del 2018 mude aria a livel provincial. L'é semper temp per jir en fujion, ma n'outa che se é jic no se pel più vegnir deretorn, e chi che va ite cogn jir co le regole che l'é à stat stabeli, amò apede sul nef statut no sarà possibol che noscia raprezentanza vegne garantida. Noi aboncont no aon la presunzion de dir che aon rejon e che duc cogn ne vegnir dò. L'é n moment delicat e per chest aon dezidù de sentir la comunanza travers n sondaje. Via per chest istà volon ruar a sentir la posizion de duc i sentadins travers chest strument, percheche no podon se permeter de falar.”

Sobito dò à tout la parola l vive ombolt Valerio Pederiva che à rebadi la posizion de contra de l'aministrazion a la fujion con Poza e Vich. “Volon che l Comun de Soraga seghite a poder aministrar so teritorie. L'é vera che te chest mandat l Comun se à troà con n fort smendrament de contribuc, con n 10% de chel che l'aea dant, ma duc i Comuns é te la valiva condizion. Gio ve envie a ge pissar sora delvers se le robe le va coscita mal da cogner renunziar a se gestir l paisc olache sion nasciui.”

Valiva posizion chela de l'assessora Sandra Bussolon: “Le persone che é nasciude chiò le cognessa aer n sens de partegnuda fort che jissa a se perder a se meter con i autres Comuns.”

I intervenc del publich

La parola dapò é passèda al publich. Francesco Dellantonio l'à portà dant l'ejempie de la Coprativa de Soraga, che enceben che l'aessa abù n bilanz positif e che la se

rejesse en pe da soula, del 1996 l'à tout la dezijion de se meter ensema a la Coprativa de Fascia. “Nesc aministradores i à abù l'antevered e l coraje de tor chesta dezijion per l ben de la comunanza percheche i à vedù che fosc da soula no la fossa più jita inant.” N confront che no ge à scusà neto nia ai aministradores: “L'é n descors che no stasc en pe – i à dit – meter a confront na coprativa con na struttura sozjala del paisc.” Paralelism che enveze é stat sostegnù con forza da Richard Pollam: “le Coprativa l'é n pont de referiment per i Comuns” l'à dit.

N'altra posizion forta a favor de la fujion l'é stat chela de Fernando Brunel: “La storia ne ensega che duc i Comuns delaite de la veia Comunità de Fascia aea soa autonomia. Pera, per ejempie, enceben che l'aesse semper fat part de Poza no la é restada endò e Mazin fosc l fossa stat bon de se parar da Fassalaurina se l fossa stat ensema ai autres Comuns. L Comun de Badia te sie statut disc che te Jonta vegn raprejentà dute

le Frazion, se podessa perveder che vegne fat valif ence te Fascia. Soraga no jirà dalonc con soa autonomia e vegnarà l moment che sarà i autres a dezider per noi.” Da più man l'é vegnù fora l pensier che fossa stat miec l Comun unich de val (Mario Pederiva, Marino Pederiva, Gianluigi De Sirena). L medemo ombolt à dit che “segur Soraga fossa stata più raprejentada te na gestion soziada unitara per duta Fascia.” Ousc coragiosa e fora dal cor de l'aministrazion l'é stat chela de la conseiera Aurora Brunel: “Mia idea l'é chela de portar inant n descors ensema a Vich e Poza e de proar a rejonar con ic per veder colune che l'é le possibilità.. Amò tinùlta Aldo Rossi à palesà l pensier che l se aessa spetà maor informazion, e no demò contra la fujion, e n descors de prospetiva conscidran la situazion de ades e le previjion se Soraga restassa da soula. Ades la parola passa ai sentadins de Soraga che travers l sondaje podarà dir la sia, dò se aer enformà e aer valutà ben duta la prospetives.



L publich te sala de La Gran Ciasa.